

Danghnaeuz, Gou Dwg Aen Ndaundeiq He

假如，我是一颗小星星

Mbwn laep lo, ronghndwen moengzmoengz loengzloengz ciuq gwnz dieg, couh lumj miz caengz baengzsa he cw gwnz dieg, gyanghwnz, gwnzmbwn cebyauyau haenx cungj miz gij ndaundeiq baenz aen baenz aen venj youq haenx, baez myab baez myab, geijlaiz lumj gij lwgda yaepmyabmyab haenx ha! Gou nyienh guh ndawde aen he! Danghnaeuz gou couh dwg gyoengq ndaundeiq haenx ndawde aen he……

Danghnaeuz gou dwg aen ndaundeiq he, gou nyienh nem youq ndaw rungj ronghndwen daxbuz raeujrub haenx, dinghdingh dwk dingq de gangj gij gojgaeq ndeidingq haenx, gangj cangzngoz, douqnyawh, go'gveiqva daengj doengh gij gojgaeq neix. Gou couh lumj laeq nyez caengz roxsoq he, cungj dwg caeuq ronghndwen daxbuz gangjriu;gou couh lumj

laeq lwgnyez gaenx he, ronghndwen daxbuz gangj gijmaz gou cungj nyinhcaen bae guhbaenz; gou couh lumj laeq lwgnyez maij guh' unj he, caeuq ronghndwen daxbuz doxndiep doxgyaez……

Danghnaeuz gou dwg aen ndaundeiq he, gou nyienh guh aen ceiq ndongq haenx, mboujlwnh seizlawz, mboujlwnh dieg lawz, cungj soengq faenh rongh he hawj gyoengq boux byaij roen laep haenx, cungj soengq rongh hawj gyoengq nyez lau laep haenx, cungj bang gyoengq lwgnyez ra mbouj raen roen haenx ra raen diuzroen baema ranz……

Danghnaeuz gou dwg aen ndaundeiq he, gou nyienh guh aen ceiq manzgyaengj he, youq mwh lwgnyez ninz dwk diemzsubsub seiz, caegcaeg gwih duzdoengz mbin haeuj ndaw fangzhwnz loq gyoengqde bae,

bienqbaenz dangz, mak, vanzgi…… Hawj gyoengqde gwn daengz yinx, caemz daengz naiq! Hawj lwgnyez vaiqvued, geijlai cig ndaej gou aen ndaundeiq iq neix angq ha!

Danghnaeuz gou dwg aen ndaundeiq he, gou nyienh guh aen ceiq simsienh haenx, youq henz cueng dongx gyoengq lwgnyez gyad faeq haenx, hawj gyoengqde mbouj caiq gamjdaengz gadog, mbouj caiq raen mbwq; gou nyienh vih dahniq gai habfeiz haenx soengq bae raeujrub, hawj de mbouj caiq dwglau; gou nyienh lumj caencik lwglan nei bae buenx gyoengq bouxlaux gagyouq haenx ganggoj, hawj gyoengqde mbouj caiq mbwqmbwt……Gou nyienh guh aen ndaundeiq simsienh he, byawz miz saeh aeu bangcoh, gou couh bangcoh gyoengqde, hawj gyoengqde mbouj caiq gadog, mbouj



caiq dwglau, mbouj caiq mbwq.

Danghnaeuz gou dwg aen ndaundeiq he, gou nyienh guh gwnz seiqgyaiq aen ndaundeiq ceiq gyaundeiq, ceiq ndongq, ceiq simsienh youq ceiq bingzfanx he! Danghnaeuz gou caen dwg aen ndaundeiq he, gou nyienh caenh rengz swheij bang gyoengqvunz guh saeh!

(roek nienzgaep Ciz Gizgiz)

Ndaem Goho

种大蒜



Ndaem Goho

9 nyied 29 hauh singhgiz roek rengx

Haet neix, gou ndaem le 9 go ho.

Gyaeujho luenzlulu, geij beixnuengx itheij doxgot dwk ndaetndaet bae, caen doxgiet bw. Gyoengqde lij doengzcaeaz daenj geij caengz byuknaeng mbangmbetmbet, haubiegbieg dem.

Gou mbouj gaenj mbouj menh duet gij byuknaeng geij beixnuengx nei okdaeuj, lij naeuz gyoengqde: "Sou miz maz vah vaiqdi doxlwnh bw, sou gangj sat gou couh yaek faenhai sou, mbouj cinj daej bw!" Gvaq le yaep ndeu, gou sai haujlai rengz cij mbek ndaej gyoengqde, yawj daeuj, gyaeujho geij beixnuengx caen dwg doxndiep doxnem ha.

Gou aeu aen bat he cang namh, dawz 5 dip ho cap roengz namh bae, lij saj caengz namh mienz he cw dem, caiq rwed di raemx, linghvaih 4 dip, gou cuengq gyoengqde roengz aen dieb iq seuqset miz raemx he bae, youq henz humx di rinlaiq,

baez yawj, caen gyaundeiq.

Yaek ninz seiz, gou nam naeuz: "Gyaeujho ha gyaeujho, mwngz aeu cengheiq bw, vaiq di maj hung!"

Gyaeujho Did Ngaz Lo

10 nyied 2 hauh singhgiz sam rengx

Haet neix, gou bae yangzdaiz baez yawj, va, gou fatyienh miz sengmingh moq lo!

Gij gyaeujho ndaem youq ndaw bat haenx gaenq did ngaz lo, gwnz dingjsoem dip ho gaenq did geu ngaz loegyeyeu he, gij sengmingh neix gyaeuj con okdaeuj, geizheih dwk yawj aen biengz moqyat neix.

Gij gyaeujho ndaw dieb cij miz dip he conh di di loegyeyeu, gou siujsim yebyeb dawz dip he hwnjdaeuj yawj, goek de maj gij rag lailai bae, couh lumj gij mumh raez daxgoeng! Gyoengqsou yaek gwn lai di yingzyangj, vaiq di did ngaz maj hungz ha!

Goho Maj Mbaw Lo

10 nyied 5 hauh singhgiz haj rengx

Youh gvaq 3 ngoenz, goho gou maj caen vaiq ha!

Yawj, gij gyaeujho ndaem youq ndaw bat haenx maj mbaw lo. Gij yiengh de miz di maj baenz cih Y, miz di maj baenz cih V, lij miz di maj baenz cih I. Gij mbaw mbaw raez miz 20 lai lizmij, mbaw dinj miz 10 lai lizmij. Mbawho raezredred, mbangmbimbi, loegsien loegsien, gig dwggyaez.

Gij ho ndaw dieb maj haemq menh, cijmiz geij mbaw dinjdedded.

Mbawho ndaej guh byaekhom, daxmeh cau j byaek seiz, dawz mbawho ronq saeqsaeq bae, saj roengz gwnz byaek bae, loegyeyeb, caen ndei yawj. Gyaeujho ak cawz haeusing haeuhauz, daxmeh cawj bya seiz ciengz dawz gyoengqde dwk roengz bya bae.

Siengj daengz daxmeh cawj gij byaek rangfwtfwt haenx, goho gyaeujho hix miz goenglauz, gou nyaenx mbouj ndaej rubrouh gyoengqde.

(seiq nienzgaep Ciengj Yij)

Daxmeh Riu Lo

妈妈笑了

Youq ndaw swngghoz, daxmeh doiq gou gig yiemz, coengzlaiz mbouj riu gvaq.

Daxboh ngoenznaengz hong haemq nyaengq. Ciuqgoq gou caeuq ndaw ranz gij hongranz hongrog cungj dwg baengh daxmeh boux ndeu gag guh. Vihliux hawj gou ciensim hagsib caeuq vaiqvued majhung, daxmeh lumjbaenz yaek sawj liux daengx ndang rengz. Gou moix ngoenz yawjraen de baenzneix sinhoj, cungj siengj gou wnggai bang de guh di gijmaz saeh.

Ceiqgaenh daxmeh bingh lo, ae lai ae raeuh. Gou siengj gou miz gihvei bang daxmeh guh di saeh lo. Daxmeh naiqnueknuek bang daengx ranz vunz cawj caeuz seiz, gou ganjvaiq bae bang daxmeh mbit byaek swiq byaek, bae guh boux bangfwngz de.

Gwn caeuz sat le, gou ciengj bae swiq duix. Lij gag bae sij cozyez, caenhguenj gou boux ndeu gag youq ndaw rug lij miz di dwglau, hoeng gou mbouj caiq heuh daxmeh daeuj ndaw rug buenx gou lo. Gou aeu hawj daxmeh miz lai di seizgan, hawj de guh gij saeh de siengj guh haenx.

Gyanghaemh 10 diemj cung, gou swiq ndang le couh yaek ninz lo, daxmeh ndaejhoengq lo, de naengh roengzdaeuj hai dennauj yawj sinhvwnz. Gou siengj, daxmeh naengh youq haenx itdingh nit, deng nit bingh' ae gya naek couh mbouj ndei lo. Ndigah gou ganjvaiq bae daek bat raemxndat he, dawz daengz henz eij daxmeh, naeuz hawj de: "Daxmeh, mwngz ceh din couh mbouj nit lo." Daxmeh unqswnh

dwk yawj gou, ndaw bak nam naeuz: "Baujboiq gou majhung lo, rox simin daxmeh lo……" Seiz-haenx, gou raen daxmeh riu lo.

Daxmeh riu le gig gyaundeiq, gij riu haenx gig ronghlwenq, gou maqmuengh daxmeh moix ngoenz cungj miz haujlai saeh ndaej simhai, gou itdingh haengrengz guh ndaej engq ndei.

(seiq nienzgaep Beiz Yi)

